

KERATAN AKHBAR

TARIKH : 4 SEPTEMBER 2021

AKHBAR : BERITA HARIAN

Laporan kewangan korporat lebih baik

Prestasi syarikat tepati, atasi jangkaan petanda situasi buruk berakhir

Oleh Mahanum Abdul Aziz
mahanum_aziz@bh.com.my

Prestasi kewangan lebih kukuh yang diumumkan sebahagian besar syarikat senarai awam pada suku kedua 2021 membayangkan situasi buruk akibat impak pandemik COVID-19 sudah berakhir, demikian kata penganalisis.

PublicInvest Research dalam nota penyelidikannya berkata, musim pelaporan keputusan kewangan suku kedua 2021 dilihat adalah lebih baik dengan jumlah syarikat mengumumkan kedudukan kewangan yang menepati atau mengatasi jangkaannya.

Ia berkata, prestasi syarikat dalam sektor perbankan dan perladangan mengatasi jangka-

annya dan begitu juga dalam sektor pengguna.

Namun begitu, katanya, kelemahan dalam sektor hartanah berfokus pengguna, REIT dan perjudian mencadangkan sebaliknya.

"Jangkaan pemulihan yang lebih kukuh dalam suku tahunan mendatang akan tertangguh berikutan syarikat terus berdepan kesan sekatan pergerakan dan penundaan pembukaan semula sektor ekonomi serta kekangan kapasiti.

"Beberapa sokongan kestabilan dilihat dalam minyak dan gas serta teknologi di tengah-tengah kitaran meningkat global bagi kedua-dua industri itu," katanya dalam nota penyelidikannya.

PublicInvest Research bagaimanapun berkata, pengukuhan syarikat menuju ke depan dijangka memerlukan satu atau dua suku tahunan lagi untuk pemulihan sepenuhnya.

"Sebanyak 22 kaunter saham (31.4 peratus) di dalam liputan kami mencapai konsensus jangkaan, sementara 25 (35.7 peratus) tidak mencapai sasaran dan 23 (32.8 peratus) mengatasi jangkaan," katanya.

Ia juga berkata bahawa pasaran saham akan kekal berorientasikan perdagangan dengan perubahan tidak dijangka dan mengekalkan sasaran Indeks FBM KLCI bagi akhir tahun 2021 pada paras 1,590 mata.

RHB Research pula berkata, keputusan kewangan suku tahunan Jun adalah mengejutkan dengan catatan yang kukuh meskipun berdepan cabaran.

Ia berkata, walaupun tempoh Perintah Kawalan Pergerakan (PKP) 3.0 lebih lama daripada dijangkakan memberi tekanan kepada pendapatan suku tahunan September, pasaran sudah mula mengambil kira prospek 2022, yang mana dilihat tahun pemulihan lebih cerah dengan berlalunya ketidaktentuan politik dan pandemik.

"Sektor penjagaan kesihatan dan perladangan melaporkan pendapatan yang boleh dipertimbangkan sebagai mengatasi jangkaan. Secara keseluruhan, 31.3 peratus syarikat melaporkan (prestasi kewangan) di bawah jangkaan sementara 22.6 peratus mengatasi jangkaan," katanya dalam nota penyelidikannya.

Bagi TA Securities, kepu-



Syarikat korporat dijangka memerlukan satu atau dua suku tahunan lagi untuk mencapai pemulihan sepenuhnya. (Foto hiasan)

tusan kewangan korporat pada suku kedua 2021 adalah masih dalam jangkaannya dengan pendapatan teras bagi saham di bawah liputannya meningkat sebanyak 26.2 peratus dari suku ke suku dan 158.8 peratus dari tahun ke tahun berikutan keuntungan kukuh dalam sektor perbankan, minyak dan gas serta perladangan.

Ia menjangkakan pendapatan saham di bawah liputannya akan meningkat sebanyak 41.8 peratus pada tahun kewangan semasa 2021 sebelum perlahan kepada 7.2 peratus pada tahun kewangan 2022 berikutan kesan asas tinggi dan penguncupan dalam pendapatan sektor sa-

rung tangan berikutan purata harga jualan kembali normal.

"Pelabur perlu meningkatkan pendedahan dalam ekuiti tempatan dengan pembukaan semula sepenuhnya ekonomi pada November selepas mencapai imuniti kelompok dan peningkatan semula pendapatan korporat.

"Pemulihan disokong oleh rangsangan fiskal yang besar yang diumumkan setakat ini dan pemangkin tambahan terkandung dalam Rancangan Malaysia Ke-12 (RMKe-12) dan Belanjawan 2022 yang akan diumumkan tidak lama lagi," katanya, sambil mengekalkan unjuran akhir tahun Indeks FBM KLCI pada paras 1,740 mata.